

21. April 2016

Tasiilami qimarnguimmik pilersitsinissamik periarfissat eqqartorneqarnissaat pillugu Naalakkersuisut Kommuneqarfik Sermersuumut saaffiginnequllugit peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq Laura Tàunâjik, Siumut)

Inatsisartunut ilaasortap Laura Tàunâjik Siumut Tasiilami qimarnuimmik pilersitsinissamik periarfissat pillugit eqqartuisoqarnissaannik siunnersuuteqarnera soqutigalugu Siumumiit imaattumik oqaaseqarfigissuarput.

Inuiaqatigiit ineriartoqqinnissaannut siuariartornissaannullu atugarissaarneq tunngaviussasoq Siumumiit isumaqartuaannarpugut.

Aammalu isumaqarpungut inuttaaqataasoq kinaluunniit pisussaasoq ilaqtaminut, qanigisaminut nunaqqatiminullu inooqataanermi timikkut tarnikkullu inuunerup atoruminartuunissaanut suleqataanikkut akisussaaqataassasoq.

Taamatulli aamma oqareeralarluta Siumut-miit oqaatigerusupparput Politikkikkut assigiinngitsutigut iliuseqarnissamut pisussaaffeqaratta. Pingaartumik nunap immikkoortuini ullumikkutuut paasisat imaannaangittut ilisimalereersimasagut arlalissuit eqqarsaatigalugit.

Aammalu periusissianik iliussissanillu assigiinngitsunik pilersaaruteqarnermi persuttaasarneq akiorniarlugu Naalakkersuisut suliniutinik ukkataqalereeraluartut Siumumiit assorujussuaq kissaatigaarput ilaqutariit nukittuut peqqissullu pilersinniarnernut ilungersornerulluta suliaqassasugut.

Nalunaarusiat siunnersuuteqartup taakkartugai imaannaangillat. Taamaammat qimarnguimmik Tasiilami pilersitsinissaq siunertarlugu Kommuneqarfik Sermersuumut saaffiginneqqusinertalim-mik eqqartueqqusineq taperserlugu matumuuna Siumumiit oqaatigissuarput.

Paasivarput Ilaqutariinnermut Naligiisitaanermut Isumaginninnermullu Naalakkersuisoqarfiup Kommuneqarfik Sermersooq nalunaarfigisimaga Tasiilami qimarnguimmik pilersitsinissamik isumaannik taperserlugu. Taamaattorli qimarnguimmik pilersitsiniarnerni naalakkersuisoqarfiup akulerussinnaangikkallarneraniq nalunaarfigisimallugu. Kisiannili periarfissaannik tikkuussivigisimallugu Qimarnguiit pillugit Namminersornerullutik Oqartussat Nalunaarutaat nr. 18, 8 decemberimeersoq naapertorlugu qinnuteqarsinnaanernik periarfissaqarneraniq.

Siumumiit taamatut oqaaseqarluta Qimarngeqalernissaannik suliniuteqaqqusineq aallartinneqareersoq ilalerparput.

Jess Svane Siumut